

A S T U R I E S

FRIÚZ

Ochobre 2024
Número 19



LES TRES ASTURIES



Editorial

LES TRES ASTURIES

INDIZ

Portada Les tres Asturias	1
Editorial Les tres Asturias /Redaición	2
Una cervería de restallu /José Antonio GARCÍA	3
Un viaxe a Guinea Ecuatorial, ex-colonia española(2) /Senén RIVERO	4
Madreñes vacíes /Miguel GLEZ. PEREDA	5
Conferencia del eurodiputáu Jonás Fdez en Villaviciosa /Rogelio ÁLVAREZ, Quini	6
Publícase 'Ganzetum' que recueye la historia de Gancéu	7
Esposición Muséu de Belles Artes /Redaición	8
El mitu de Sísifo y la filosofía camusiana del absurdo /Lluís PORTAL	9
Opinión. Villazón. /Lluís PORTAL	10
L'Estranxeru /Albert CAMUS SINTES	11
Cordinadores: Lluís Portal y Xuan Pedrayes.	12
Conseyu redaición: Miguel Glez Pereda, Toño García, Salvador Barro, Marga Solares, Macario Victorero, Rosa Fernández, Senén Rivero, Daniel García-Pedrayes.	13
Compañía del Ronchel elronchel@gmail.com	14
Sofitu de:  	15
El Ronchel	16

L'aprobación del estatutu d'autonomía d'Asturies en 1981, y la siguía consolidación del réxime político que mos gobierna dende entóncenes, decatóse pol tazamientu de la nuesa sociedá y el nuesu territoriu en tres estayes bien separaes. Xurdieron asina les tres Asturias, que se dan la espalda, modelu onde tamos allancaos dende entóncenes: ¡¡Fae más de cuarenta años!!

La primera, y más esclariada d'estes Asturias, insolida y privilexada, entámela les cuenques mineres, sobre tou les centrales del Caudal y el Nalón. Inversiones, subvenciones, prexubilaciones llibres d'impuestos, fondos mineros, universidá, infraestructures, perres y más perres... tou fure poca pa elles: el desbaraxuste sindical llevóles a l'acabación.

La segunda Asturias d'esti réxime ye la 'urbanita', asitiada na conurbación metropolitana. Entiéndese como moderna, pero una conciencia de clase sectaria y la falta d'una élite tecnócrata, preparada y con oxetivos, condorgóla dafechu. La so brengá económica esñiza la so apatía. Esa sociedá urbana nun dirixe'l país, nun tien cuayu pa ello, nin 'opinión pública'.

La tercera, l'aldeana, fuere

abandonada a la so suerte, y a la de la PAC, aplicándo-y el cinismu y paternalismu al emparrar. El réxime considérala atrasada y reacionaria.

La falta del so desarollu estatutariu (artículu 6) que debiera habese hecho a traviés de les mal llamaes 'parroquies rurales', ye una de les mayores engañifles de tolos gobierños democráticos. Estos asturianos de tercera siéntense abandonaos pol réxime socialista y trataos como fatos pola TPA (l'insultante programa 'Pueblos' ye la preba d'ello).

Estes tres Asturias son un tabú, que tol mundiu conoz y naide quier amestar. Y ensin cohesión social, nin territorial nun seremos quien a trabayar xuntos. El nun tener oxetivos comunes llevómos al 'provincianismu', la nuesa mayor llaceria.

La inmigración a lo xole y la llegada de refuxaos climáticos espitolaos espárdense anguañu pente les tres Asturias, enanchando'l marabayu.

Ente toos los asturianos tenemos que ser quien a igüar un futuru perdurable y mejor, y más n'estos tiempos onde les autonomías d'España emprencipien la carrera del sálvese'l que pueda, afalaes por un presidente de gobiernu feble y felón. ■



F

R

I

Ú

Z

Cordinadores: Lluís Portal y Xuan Pedrayes.

Conseyu redaición: Miguel Glez Pereda, Toño García, Salvador Barro, Marga Solares, Macario Victorero, Rosa Fernández, Senén Rivero, Daniel García-Pedrayes.

Compañía del Ronchel
elronchel@gmail.com



El Ronchel



Sofitu de:



Conseyu de Villaviciosa

Una cervería de restallu

José Antonio GARCÍA

En tiempos de sensaciones líquides, rápidas y vaporosas, nun presumir de conozer el 'skyline' de New York y la 'City' de Londres pue tenerse por paletada, pero si glayes que la modernidá y l'arcondanza duradera atópase nun pueblín de 67 vecinos, metíu ente arispies montañes, entós les posibilidaes de ser teníu por sociu del manchegu Don Quixote algamen el tamañu de la mar Cantábrica.

Una cervería nel Valle d'Ardisana

Fai bien pocu, un diaru importante de tirada nacional pregonaba a toa portada les escelencies d'una cervecería 'cool' del centru de Valladolid: si'l bien intencionáu reporteru tuviere'l pruyiciu de desaxe cayer pol Valle d'Ardisana pondría-se-y'l semblante del color de la berrina que tan de siguío tapa les cumes d'esti benditu país nuesu, al decatase que la noticia taba en Ricaliente y non na capitaliega urbe castellana.

Pero claro, siempre ye más fácil remanase poles munches aveníes surbanites que pagar el preciu de perdeser por carreterines onde la pallabra más emplegada nun vien nel códigu circulación: oriellar, porque'l que nun tea dispuestu a circular apegáu a la cuneta y al retrovisor col conductor del sen contrariu, más-y vale que quede en casa.



Si vencemos la llercia inicial y decidimos entamar viaxe -a la sombra de picos de formes caprichoses como Benzúa y, sobre tou, El Culobardón- en cinco minutos y tres quilómetros algamamos Riucaliente dende La Puente Nueva. Ya solo mos queda cruciar el ríu y admirar el templu llaniscu de la cerveza, porque sí, esta ye otra de les milenta ayalgues d'esti conceyu oriental.


Con una terracina na oriella'l ríu San Miguel, la primer tentación que tenemos ye sentanos nella a evitar que'l tiempu mos mate coles sosprises.

Pero na visita iniciática ye mejor pasar dientro p'almirar, como ya se

decaten dende la mesma puerta, les maravíes d'esta 'Capilla Sixtina' de la malta de cebada y el lúpulo... o la ensin gluten, pues tolos fieles de la cerveza tienen cabida nesta santa casa.

La primer y rápida güeyada yá mos alvierte que nun tamos nun requexu más onde ganar cuatro aplausos-'likes' nel 'Instagram' o'l 'Facebook'. Esti espaciu necesita una calmada reverencia especial, dalgo asina nun s'atopa a diariu y menos n'Asturies rural.

Pero vaigamos seliquo. Esta ye una historia cocinada a fuéu lento, de coses pequeñes que con tiempu y procuru pasen de piquiñines a grandes, asina que calma.▶



Corría'l sieglu XX y el 15 d'abril de 1952 -que ya lloviere y ñevare, anque agora menos- Gabriel Fernández Díaz, mutiláu de guerra, abre pa poder ganase'l pan 'Casa Gabriel', un barín-tienda de los de tola vida que tanta alegría y cohesión social dabén, y dan, nos pueblos a los pocos valientes que van resistiendo. Pero claro, la cosmovisión astur nun podía dexar pasar tal agraviu y pronto emplegó esa lóxica aplastante de la que fai gala: si'l bar ta xuntu a un puente... pues Bar El Puente, y punto; cencielo ¿non?.

Y asina, con tal nome y col correr del tiempu, aporta la xubilación del fundador y la puesta'l mandu de la xestión d'agora, Blanca Fernández Prieto, la sobrina de Gabriel, y'l so maríu José Antonio Gutiérrez Bures.

Blanca prefier mantenese nun segundu planu y simplemente confirmar o puntualizar dellos datos, dexando'l pesu de les rempuestes a José Antonio, que se define como xerente, relaciones públiques y asesor... de cerveza, lo que la modernidá llíquida anantes mentada titula C.E.O.

"H.iyu, hai que meteles allá"

Tien una conversación allegre y entretenida, enllena d'esa coña tan asturiana que sólo dellos son capaces d'atalantar, como por exemplu cuando nos diz con retranca que l'impresor de les lletres del subnombre 'El mundo de la cerveza' nel tol du la terraza opinaba que yeran munches lletres, recibiendo por rempuesta "pues h.iyu, hai que meteles allá".

Cuéntanos tamién qu'élli, cuando sal, ye más de cubalibre, alcordándose que la cabera vez que tomó quintos de cerveza fuere polos 'pubs' de la villa capital del conceyu, pidiendo pa les fiestes del pueblu, y con eso ya llenó'l cupu pa una temporada.

Por facer una descripción ordenada, vamos emprencipiar pola parte comercial, porque nesti valle ricu en guapura y naturaleza tamién se come. Nesta estaya la memoria de José Antonio va peñerando les alcordanças del comienzu: lo



primero, y alministración obliga, por temes burocráticos tienen que quedase sólo cola parte hostelera y renunciar a la venta d'otra triba de preseos que se vendíen pa les llabores rurales.

Dempués, pa potenciar el negociu, deciden apostar poles cerveces belgas, tan nomaes y reconocíes n'aquellos años; lluéu, guetando un pasu más na excelencia, deciden apostar poles cerveces artesanales: y que mejor que facelo entamando con aquella marca que naciere n'Uviéu y lluéu pasare a Xixón, Belenos ¿qué asturianu nun la tastió por facer país? ¿O la especialidá de la mesma casa con miel de Somiedo, Esbardu?

Alcordances de sabores que quítannos años. Pocu a pocu l'españíu de les cerveces caseres espoxiga, y deciden apostar poles manufactures asturianes, llegando a tener un catálogu-carta fechu por ellos mesmos en 2015 con toles marques del país.

Pero como tou camín n'Asturies tien curva, el COVID torció un negociu que paecía imparable, franciendo munches de les fábriques asturianes y obligando na era post-pandemia a abrise a mercaos d'otres comunidaes, pero siempre cola seña d'artesanales.

Un almacén de Torrelavega, suministrador habitual, trabaya con unes 700 marques! Y llega otra coña: les catalanes son de gran calidá, pero la xente y la política... hasta ehí trescribo.

De les ventes más sorprendentes faen memoria de cuatro unidaes de cada triba al Centro Asturianu de Valladolid, ablucaos por aquel despliegue d'opciones, tou cola correspondiente factura. Daquella fuere'l tirón que tuvo la marca Maeve, promocionada como "la cerveza de Bruce Springsteen", tres sabese qu'esti cantante y los sos músicos cuando tuvieron en Xixón arrasaren con toles caxes que tenía una cervecería de la capital 'playa'.

Y pa terminar lo venal de la visita, sólamente queda char un güeyu ►



a toles botelles cola so etiquetina de propiedades organoléptiques para garantizar una bona eleición. Una vez fecha, yá solo queda tastiala y que'l mirar nos lleve a la segunda ayalga, y esta gratuita, dientro casa: la colección de cerveces.

Equí la desplicación de José Antonio, a la par que didáutica, ye imprescindible pa nun naufragar nesti mar de cerca ¡3.000! botelles de tol mundiu. Como en toa llista que se precie destaque les plusmarques, que José Antonio enumera bajo l'aprobación de Blanca: la más llonxana, de Nueva Caledonia (a la veriquina Australia); la que tien más alcohol, 23 grados, la cuenta pa volver oriellando; la más grande, que 'sólo' pesa 15 kilos; lo más raro, un bote de la marca Viking, islandés y casi la única que se fabrica naquella isla, aportáu por un veraneante de Niemburu (más guapo qu'Islandia). Esto nun medible, si yá falamos de lo peculiar y sentimental: una alemana cola etiqueta del revés pa que la pueas leer mientras bebes de la botella; un bote de Skol qu'alluma la señardá de los que somos más vieyos: la primer cerveza española en llata que conocimos; les d'envase cerámico, autentiques xoyes artístiques; marques peculiares como 'Caldo de pollo', nome pocu comercial... y, si falamos de lo escabroso, como cuenta con picardía'l narrador, la botella de Sexy Pils, de los tiempos de los calendarios de llamber, cuando moces escalforiaes na

semeya yeren reclamu publicitariu, y más si diben perdiendo prendes con aiciones que val más imaxinar que cuntar.

Podíemos llenar más fueyes con hestories y anécdotas, pero soi de la opinión que lo bono ye experimentar les coses y sensaciones en persona, asina que pasar a conocer l'ambiente cervezeru ye lo más adecua.

Ilustres parroquianos

Non solo polo equí espuesto hasta agora, si non también pol 'equipu parroquial d'asiduos veceros, formáu por grandes personas y personaxes, como coincide nesti día con Inacio'l carpinteru, n'animáu alderique sobre'l mou de sustituyir a San Cipriano y los santos acompañantes na capiella'l pueblu, que polo visto decidieron marchar a dar un 'paseo' ayudaos por dalgún co-

llaciú de lo de los demás.

Eso sí: si queremos facelo, mejor un día que la corriente humana qu'arrastra'l Camín Encantáu nun afuegue estos valles.

Esti país ye tímido y ante les grandes aveníes d'homo sapiens plíégase sobre so y esconde la so ánima y'l so agospiu ante xente con prises y protestona.

Tenemos de zarrar esta prestosa visita, yá con gana de tornar otra vegada, con dos caberos apuntes: el primeru, sí, tamién hai cerveces industrielles pa los 'repunantes' que nun quieren abrise a novedaes. Y, segundo, cola única puntualización que mos pide Blanca: los bolígrafos de la tamién colección NON SON PA VENDER, solo pa mirar. Y tres: del caberu sorbiatu d'una prestosa 'ida y vuelta', que tomamos a la par que facíamos la entrevista, sólo quedamos dicir ¡¡Salú!! ■



Un viaxe a Guinea Ecuatorial, ex-colonia española (2)

Senén RIVERO

Apartir de 1926 les isles y el continente fueron xuníos nunha colonia, la Guinea Española, y entamaron a establecer plantaciones de cacao. Durante la II República permaneció fiel hasta setiembre de 1936, en que se xunió al alzamiento franquista.

En 1956 estos territorios organizáronse col nome de Provincia del Golfo de Guinea y, tres años más tardi, en 1959, dividióse en dos provincies: Río Muni y Fernando Poo, con un Gobernador Xeneral. En 1960 celebráronse les primeres eleiciones llocales escoyéndose a los primeros procuradores a Cortes ecuatorianos.

En 1963 fixáronse les bases de l'autonomía, que fueron aprobaes mayoritariamente. Dotóse a la colonia d'una Asamblea, un Conseyu de Gobiernu y un Comisariáu.

El primer presidente fue Bonifacio Ondó Edu. Dos años más tardi, en 1965, l'asamblea de la ONU aprobó un proyeutu nel que se pedía qu'España fixase lo antes posible la fecha de la independencia.

En 1968 España anunció que concedería la independencia y, n'augusto d'esi añu aprobóse en referéndum. La nueva Constitución fue supervisada por observadores de Naciones Xuníes.

Primeres eleiciones en GE

En setiembre celebráronse les primeras elecciones presidenciales, con cuatro candidatos, siendo escoyíu ensin mayoría absoluta Francisco Macías Ngema, quedando segundu Bonifacio Ondó. Al pocu Bonifacio fue asesináu por Macías.

Tres un intentu ficticiu de golpe d'estáu, Macías, sangrín, declaró una dictadura y una xabaz represión. La comunidá española sintióse peramenazada y en marzu de 1969 reembarcaron les tropes y colonos esistentes en Río Muni y Fernando Poo, terminando la presencia española.



Catedral neogótica de Santa Isabel, en Malabo, capital del país.

Tres once años de completu de sastre y abandonu de toles infraestructures -eléctriques, suministru d'agua, carreteres, tresportes, salú, el país cayó na ruina. Les escueles fueron zarraes, el cultu católicu prohibíu, los trabayadores nixerianos espulsaos y la economía fundida.

El trés d'agostu de 1979 Macías fue derrotáu por un golpe d'estáu lideráu pol so sobrín, el teniente coronel Teodoro Obiang Nguena.

Macías fue xulgáu y executáu. La población había baxao nesi añu a un terciu de lo qu'había en 1968 cola independencia, debío a la emigración y al esterminiu exercíu neses once años.

Dende entós les eleiciones fueron amañaes sistemáticamente y Teodoro y la so familia, asina como la so etnia, acapararon los estamentos de poder del país. Los partíos opositores fueron disueltos o presos. ►

El fíu Teodoro Obian, el conocido 'Teodorín', ye nomáu Vicepresidente y ministru.

En 1996 la empresa Mobil americana escomenzó la estracción de petróleo y llegó a ser el tercer productor del África sosahariana, tres Angola y Nigeria, llegando a producir 400.000 barriles diarios. Pero esi dinenu nunca llegó, supuestamente, a les arques nacionales, fure esviáu dafechu a cuentes en paraísos fiscales y quedó en poder de la clas dirixente y familiar.

Anguañu, el petróleo acabó, los americanos marcharon y queda solo la producción de gas.

En payares de 2022, tres 43 años nel poder, Obiang fue reelexíu nes eleiciones xenerales col 99,7% de los votos, convirtiéndose tres la muerte de Mugabe y Gadafi nel gobernante más veterano d'África.

El viaxe al país africanu

Nun esiste vuelu direutu dende España a Guinea. Nosotros ficímoslu a traviés d'Alemania, Nigeria y Malabo. Equí ya entames a ver coses mui rares. L'avión, con más de trescientos pasaxeros, a la so llegada a Lagos, descienden casi toos y llegamos a Malabo 35. L'aeropuertu internacional de Malabo, que ye nuevu, de dos plantes, estílo la T4 de Madrid, nun tien pasaxeros, nin pantalles funcionando, nin aviones nin 'duty free', ni restoranes...

A la vuelta tuvimos casi cuatro hores nel aeropuertu nin despegó nin llegó nengún otru avión: creo que fue construíu por empreses chines que son les que faen agora toles obres públiques nel país.

Agospiámonos nel reformáu Hotel Bahía, que nel so orixe yera'l parador nacional inauguruáu por Manuel Fraga cuando yera ministru de turismu nes dómines de la colonia.

Al día siguiente recorrimos Malabo. Visitamos el Centro Cultural Español, el Centro Cultural Ecuatoguineanu, la



Escolinos de la capital del país. Malabo.

Plaza la Independencia, la catedral neogótica de Santa Isabel, el barriu d'Ela Nguema, el paséu marítimu, el mercáu, la Biblioteca Nacional que s'affaya nun edificiu remozáu, mui guapu, pero lo curioso ye que malpenes había llibros, la mayoría de les trabielles taben vacíes. Eso yera de lo más ablucante.

En tol país nun esiste nengún periódicu diariu, lo más apaecío ye un dixital que sal una vez por selmana. Tampocu esisten cines en Malabo. Sorprendió tamién ver tou escrito n'español, sobre tou les tiendes de comestibles: 'abaceríes'.

Equí yá tomé contautu cola comida que me diba a atopar nel país: la carne de pollu o de cabra, dempués tou tipu d'animales selvaxes: cocodrilu, perrucuspín, monu, serpiente, antílope, pangolín, cebú, boa, tripes de vaca....

En pescáu: pargu, chicharru, coloráu, calamar, llocántara o llagosta... Tou acompañao con dellos tubérculos como yuca, malanga, ñame o bien arroz y plátanu machu fritu.

Riegase tamién con salsa iguada con cacagüés, tomate fritu de bote o salsa de chocolate. ■



Vista aérea de Malabo.

Madreñes vacíes

Miguel G. PEREDA

Si un llee'l Llibru del Xénesis, ye cenciellu discurrir que cuando echaren a Adán y Eva del Paraíso debió ser pelos meses d'ochobre o payares, tiempu de la mazana y cuando estes tan en sazón. Tiempu fríu pa dir en carnes. Non diba muchu que se habín separáu les agües de la tierra, asina que ye fácil pescudiar que a la parte fuera del Xardín del Edén casi tou debía ser una llamaraga, un barrizal y una humedanza de meter miéu.

Dícenos los llibros sagraos, que se taparen con fueyes de parra, que non calen y escalecen, pero non dicen nada de los pies, nin de cómo s'apañaren pa caminar n'aquel mundiu de folla, fríu y humedancia, asina que lo más seguru ye que fiieren unes madreñes.

Non debín ser muy amañaes, yeren les primeres que facín y tam pocu tenín ferramienta apropiáu pa ello, quiciaves unos corteyos o un trozu madera atáu al pie con blimes de salguero o tires d'espadaña. Habrá quien piense qu'aquello yeren más unes sandalias qu'unes madreñes, pero ya se dixo que yeren les primeres y que la perfechura en madreñes non esiste hasta cumal de los madreñeros asturianos nos sieglos XIX y XX, güei mortecinos y sacramentaos, y los del conceyu maliayu, llamentablemente desapaicíos.

Los fiyos y descendientes d'aquellos primeros pás, qu'escoyeran vivir nes tierres moyaes, lluvioses y fríes, fueren ameyorando, afinando y peracabando les carauterístiques de la madreña, escoyendo y estremendo maderes: abedul, castañal, faya, umeru, nozal..., dándoyos formes, trazos y nomes distintos d'alcuerdu al so menester, y estremándoles de les d'otros llugares y países.

El llenense Xulio Concepción Suárez, profesor y doutor en filoxía, fixo un perinteresante estudiu sobre la etimoloxía de la palla-



Vendiendo madreñes nel mercáu de Cangas de Narcea.



bra madreña, que resume asina: "La pallabra indoeuropea 'mater' (orixen, raíz, la 'ma'), dio en griegu 'méter' y 'métra' (matriz); llueu nel llatín 'mater' (madre), más tardi, nel mesmu llatín materia (materia, tueru d'árbol); y col deriváu del sufíxu, daría nel llatín vulgar materinea (perteneciente a la madera). Y d'ello al so desendolcu nel romance medieval, onde finaría en madreña: fechu de madera".

Per tol mundiu emplegóse calzáu de madera, había materia prima abondo y barato, y el calzáu

yerá afayaízu y provechosu. A más de los madreñeros profesionales, per muchas cases na aldea, había un bancu, que se llamaba 'burru', onde colgaben los aperios y ferramienta precisu pa facer madreñes pa en casa, llabor que facín pel inviernu.

Asociábase la madreña al calzáu de pocu valir, usáu pela clase trabayadora, principalmente del campu, tamién na mina.

Anque fueren calzaes per xente de toes tribes sociales, efeutivamente les madreñes tan estimaes como calzáu usáu polos campesinos, a los que yos allanaba'l trabayu na tierra y amparaba de la humedá, el barru y la nieve.

En daqué industries y fábriques, les madreñes y calzáu de madera foi consideráu calzáu de seguridá, y perrecomendáu pelos sanitarios pa caminar y caltener el pie sanu.

Dalgunos pescadores de la mar usábenles, nuna época de perduración y resistencia, hasta qu'apacieren le botes de goma; gastaben unes madreñes ensin tazos a la qu'amestaben una caña, de primeiros de cueru, llueu de goma de cámara de rueda de camión clavada a la madreña. ►

En Villaviciosa yera costume l'usu de madreñes y, práuticamente tol pueblu les gastaba. Consta de como alcaldes y conceyales diben al Ayuntamiento en madreñes, y cures y feligreses calzábenles pa dir a la ilesia. Unos y otros dexábenles a la puerte, y esto ocurrió hasta nun fai muchos años, de fechu nes ilesies de les aldegués tovía puen vese dalgunes madreñes a la entrada d'alguna misa, cabu d'año o celebraciones que se fagan n'inviernu, con mal tiempu y non sean de festexu; a éstes vase con calzáu más ostentosu y modernu.

Nes normes pa la utilización de la Biblioteca Municipal A. Balbín d'Unquera de Villaviciosa, inaugurada nel año 1955, nún de los puntos encamiéntase a los usuarios el cumplimiento de deixar les madreñes na entrada.



Cándido Cambiella, encargáu y persona que foi esencial na vida y desendolcu del Teatru Cine Riera, cuenta que yera mucha la xente que diba al cine en madreñes, que les dexaben nel soportal, y recuerda l'estrenu, creo que de la película 'Lo que el viento se llevó', con un llenazu grandiosu, que quedaba ablucáu y almiráu de la cantidá de madreñes que había nel estragal y que, a la salida tol mundiu atopara les suyes, ensin que se hubiera perdíu nin camudara nenguna.

Miles d'años calzaren les madreñes los pies de los asturianos. La madera de les madreñes retién l'aliendu de milenaries viesques bastíes, son heroínes d'almirables



Paisanos del Condado, Llaviana, lleendo'l periódicu.

fazañas y virtúes por abegosos caminos percorríos. Ye la manera d'andar y pisar d'un país, güei adoctrináu y de glories olvidaes. Coñocen la nuesa historia mejor que naide, dientro d'elles vieren y vivieren el mundu escritores, políticos, nobles y reyes d'esta tierra. Nun ye fácil imaginar al nuesu más grande rei, Alfonso III, el que escoyó el valle de Boides para vivir, nuna dómina onde los caminos taben munchu más tiempu moyaos qu'ensuchos, y la humedá y la folla yeran más persistentes, usando otru calzáu que nun fueren madreñes pa dir del palaciu a la capiya palatina, güei Conventín, o p'andar el paisaxe del Valle de Dios. Paisaxe qu'aliviaría'l sufrimientu causáu pela ingratitú, l'ambición, traición y negra conxura de los sos fiyos, afalada pel so consuegru, el conde Nuño Fernández.

Quiciaves, pescudiando y meditando acerque la estraña, fráxil y ruin condición de l'alma humana, y sobre los conseyos de la so propia mujer de lo inútil y gravosu que resultaba pa los intereses del reinu una guerra civil escontra la so familia, de lo feble que supondría el frayamientu de

los sos exércitos y súbditos pal amparu del territoriu astur, y la so abdicación como remediu. El rei Magnu, xeneroso y magnánimu don Alfonso'l Terceru.

Si empatía ye ponese nel llugar del otru, pescanciar les sos emociones, el so sentir, quitar los zapatos y poner los del otru. Diz la doutora n'educación Lynn Murray Chandler, que calzar les madreñes qu'usen los aldeanos asturianos, permitirá ver y sentir el so pensamientu, y será fácil atalantar y conocer la situación que tan viviendo los nuevos paisanos.

Con motivu del Día d'Asturias y de la Virxe de Covadonga, voi pidir a la Santina un par de madreñes pa caún de los nuesos diputaos y miembros del Gobiernu, pa que les pongan cuando vayen tratar asuntos que nos afeuten, porque nun me cabe dulda que muchos de los problemas que tenemos nel Principáu tan nes madreñes vacíes. ■



L'eurodiputáu Jonás Fernandez desplicó la importancia d'Europa na llexislación de los países miembros

Rogelio ÁLVAREZ, *Quini*

Denuncia que sólo vota alrodiu de la mitada la población española (en xunetu de 2024 foron el 49,21%), destacando la llibertá de votu que permite conseguir mayoríes en temes importantes p'Asturias, como la descarbonización o la transición enerxética.


El candidatu del PSOE a les eleiciones europees, Jonás Fernández Álvarez, aseguró'n Villaviciosa, nel trescursu d'un actu de la Compañía del Ronchel, nel Atenéu Obrero, baxo'l título 'El Parllamentu européu y la so importancia pal xorrecer d'Asturias' que "ente'l 70% y el 80% de la llexislación española afáyase influenciada direuta o indireutamente pola normativa de la XE. Esti datu inclúi tanto les lleis que se deriven de reglamentos europeos como les directrices que deben ser trespuestes a la llexislación nacional española.

L'economista y miembru del Grupu Progresista européu dixo que ye especialmente significativa esta influencia en temes tan importantes p'Asturias como'l mediu ambiente, l'agricultura y la pesca, competencia, mercáu unicu y la industria.

Per otru llau destacó tamién el fechu de que na UE nun esiste la "disciplina del votu", de tal manera que los eurodiputaos pueden votar escontra'l so grupu en cuestiones concretas siendo bastante normal que políticos d'ideoloxíes estremeses voten xuntos d'alcuerdu colos sos intereses nacionales o rexionales.

Esti votu acomodaticiu de funcionar de la política europea abre puertes a la negociación y al pautu y esixe al mesmu tiempu -pa que pueda ser efectivu y seya posible encadarmar estratexes de presión- un fondu conocimientu de los intereses y necesidaes de los distintos países y rexones que formen la XE.

Anguaño atópense en tramitación temes qu'afeuten direutamente a Asturias y que son cruciales pal so xorrecimiento económico y cultural, como les polítiques de descarbonización y enerxética.



Estes polítiques traten de fomentar nueves fontes d'enerxía renovable que seyan al mesmu tiempu xeneradores d'emplegu sostenible, o la reforma de la Política Agrícola Común (PAC) en materies como la xestión ambiental y la sostenibilidá de les esplotaciones rurales, dalgo trescendental pa la rexón.

Acabó poniendo de maniestu la paradoxa de qu'a pesar de la vital importancia qu'a tolos efeutos tienen les instituciones europees el desconocimientu y la desinformación que los ciudadanos tienen de los asuntos europeos ye descomanada, de tala manera que la participación nes elecciones al Parllamentu Europeu ye la más baxa, ensin duda, de toles consultes elleutorales que se faen n'Asturias y n'España.

Ye tamién significativu'l fechu de que'l 56% los ciudadanos que voten, voten porque ye'l so deber non pola so afinidá colos programes o propuestes de los candidatos y, al mesmu tiempu el 65% de los que nun voten, nun voten porque creen que'l so votu nun va servir pa camudar nada.

En definitiva, como se dixo al final de la presentación de l'actu de Villaviciosa, esperamos que la conferencia de Jonás Fernández hebia contribuíu a despertar l'interés por una institución de cuyes polítiques depende en gran midida'l futuru d'Asturias. ■

Publícase'l llibru 'Ganzetum', que recueye la historia de l'aldea de Gancéu, un pueblu medieval maliayu



L'asociación de vecinos La Peñueca celebra los sos primeros 25 años cola publicación d'un llibru que recueye la historia d'esti pueblu antiguu, que pertenez a la parroquia de San Esteban de Miravalles (Villaviciosa).



Apocayá presentóse na Fundación Cardín el llibru 'Ganzetum', de Lluís Portal, sobre la historia de Gancéu. La obra ye publicada pola asociación vecinal La Peñueca d'esta aldea y editada pola Editorial Trabe; el prólogu ye de José Vicente Vallín Amandi, presidente de La Peñueca que celebra'l so 25 aniversariu.

Recuéyense datos d'estremada procedencia relacionaos cola historia del pueblu y la parroquia de Miravalles (Villaviciosa): los padrones de población, el Liber Testamentorum, un documento del 1579 sobre l'incendiu ocurriu nel pueblu...

Atópense datos de topónimia que ratifiquen l'orixe celta –presumiblemente deriváu del antiguo gaélicu irlandés-, fotos antigües dalguna con más de 130 años, la historia y protohistoria del castru de Moriyón, direutamente relacionáu colos pueblos y caseríes de la zona, el Muséu Diccionario d'Uviéu, l'INE sobre l'apellíu Gancedo, les informaciones sobre la calzada romana de la Vía Cantábrica que pasa pola Llera a Priesca...



La Peñueca asoleyó en principiu doscientos llibros de los que prauticamente tan vendíos cásique tolos exemplares. (En Villaviciosa viéndense na llibrería del Güevu).

La iniciativa ye mui positiva y abre la puerte a la publicación d'otres monografías asemeyaes n'aldees y parroquies del conceyu o d'otros conceyos asturianos.

Foi posible gracias a la colaboración de los habitantes de l'aldea y de los pueblos que la llenden; tirando de muchos trabayos sobre topónimia, sobre les deidaes romanes o, sobre les capilles cristianes. ■

Gancéu ye un pueblu abondo desconocíu de la parte alta de Villaviciosa, fundáu na alta Edá Medía. Figura nel Llibru de los Testamentos del añu 921, xunto col hidrónimu Mestres (Mestas), El Sellón (Selio), la Casería de La Sala, Priesca, Cueli, el manantial de Fontovial, el ríu Toroyes...

L'interiorismu de Menéndez Hevia

La esposición José Antonio Menéndez Hevia. Idea, Materia y Oficio ye la primera amuesa so'l diseñu que se puede ver nel Muséu de Belles Artes d'Asturias. Dedicada a una de les grandes firmes del interiorismu comercial que marcó una dómina d'actividá profesional, igual nel Principáu d'Asturias como notres rexones d'España. Nació n'Uviéu en 1937 y con una formación pocu convencional, dende mui xoven, fundó una empresa especializada en diseñu interior (DIHER) que se convirtió en referencia del interiorismu modernu, sobremanera en comercios, bancos y llocales d'hostelería. La esposición, asitiada nes sales d'esposiciones temporales del edificiu Ampliación hasta'l 13 d'ochobre. La muestra reivindica la importancia del interiorismu como patrimoniu cultural, rara vez conserváu y sometíu a los cambios de propiedá o a les reorientaciones de negocio de les empresas. ■




La so fraxilidá fai que sea relevante historiar la so esistencia, como exponente de les formes de sociabilidá, de los cambiantes modelos de venta y de conexión col cliente o de la definición de les imáxenes de marca de les firmes al traviés de los sos interiores. Son 100 imáxenes orixinales, bocetos y prototipos, una ventena de pieces de mobiliariu y diseñu industrial, de 35 paneles. ■



Esposición d'estampes d'Antoni Tàpies

El Muséu de Belles Artes uiferta de xunetu hasta el 27 d'ochobre, ente les sos esposiciones una d'Antoni Tàpies i Mestres, *Estampes* (1969-2011), que propón un selectu percorriú pola obra gráfica d'un de los más destacaos artistes españoles de la segunda mitad del sieglu XX. Tàpies (Barcelona, 1923-2012) trabayó nes estremaes téuni-

ques d'estampación como prolongación de la so pintura, por que la so producción gráfica comparte carauterístiques: la xestualidá expresa da pola repetición de diversos elementos caligráficos.



Antoni Tàpies i Mestres.

cos, signos y referencies a oxetos cotidianos y partes de la figura humana; y el tratamientu del soporte de la obra como parte esencial y visible de la mesma, escariando'l papel, amestando-y otros materiales y testures.

Toa ello converxe nuna de les más sólides y evocadores propuestes del informalismu na so vertiente más claramente 'matérica'. La ventena d'estampes qu'encadarmen l'amuesa provienen na so mayoría de coleiciones particulares, a les que se sumen cuatro obres de los propios fondos del Muséu. El conxuntu ofrez una visión evolutiva de la produción del artista nesti mediu dende finales de los años sesenta, cuando cuayó'l so llinguaxe maduru y sistematizáu de la so actividá gráfica; hasta les sos caberes estampes, realizaes en 2011. Con esta esposición el Muséu súmase a la conmemoración del centenariu del nacimientu del artista. Tamién ta enmarcada en dicha efeméride y concebida a mou de diálogu con esta amuesa, *La Obra invitada* del segundu cuatrimestre de 2024, protagonizará la *Signe i matèria* (1961), cedida pol Muséu de Belles Artes de Bilbao. ■

Amador, escultures y maquetes


La esposición Amador nel Museo de Bellas Artes de Asturias propón un acercamiento a la producción d'Amador Rodríguez (Ceuta, 1926 – Madrid, 2001) mediante los numerosos fondos que'l Muséu conserva del artista. Trátase de la segunda amuesa que la institución programa en 2024 en cumplimiento de la so misión de difundir so colección n'estremaos llugares d'Asturias. Nesta ocasión celébrase nel Centru d'Escultura de Candás Muséu Antón, espaciu afayaizu pa esponer a un de los principales escultores asturianos del sieglu XX, al qu'esti Centru yá dedicó varies



amueses de caráuter individual.

Como s'aprecia en el subtítulo, la esposición nun se llenda a una selección d'escultures, mediú d'expresión principal d'Amador, sinón que pretende uifertar una visión amplia y variada de la so obra, qu'inclúi maquetes, pintures, 'collages', dibuxos y medalles. Esta variedá estiéndese tamién al marcu temporal, incorporando exempllos dende mediaos de los años sesenta hasta finales de los noventa, qu'illustren gran parte de la evolución del artista.

La esposición permanez abierta hasta el 27 de setiembre. ■



El mitu de Sísifo y la filosofía camusiana del absurdo

Lluis PORTAL

Na mitoloxía griega Sísifo fue'l fundador y rei d'Éfira, más tardi conocida como Corinto. Quiciavis tamén heredó'l tronu de Medea. Yera ún de los siete fíos d'Eolo y Enareta, y esposu de Merope, fía d'Atlante. Sísifo yera un exemplu de rei impíu conociú pol castigu exemplar que se-y impuso a causa de robar el fueu a Zeus y dayu a los homes. Consistía n'embarriar una piedra cuesta arriba per una montaña pero, antes de llegar al cumal, volvía a rodar p'abaxo, fechu que se repitía una y otra vegada como exemplu de lo frustrante d'un procesu a lo xole. El términu "trabayu de Sísifo", que s'usa anguañu pa describir un trabayu duru que debe facese una y otra vegada, tien el so orixe nel castigu de Sísifo. Sísifo yera notable pola so astucia, pero nin siquiera élli supo prever a Autólicu que-y robaba'l so ganáu ensin que lo supiera.

La filosofía del absurdo ye una teoría que parte de la idea del sinsentíu de la vida, la razón nun algama a pescanciar el sen caberu de la esistencia humana. Un de los pensadores que defendió'l principiu del absurdo fue'l francés, naciu n'Arxelia, Albert Camus.

Hai un debate sobre la base del enquiz ente l'home racional y l'universu irracional, la griesca del individuu por da-y forma concreta a dalgo que nun resiste lo evidente. El conceptu del absurdismo ye que'l mundu, en so conxuntu, ye absurdu, qu'hai una incapacidá pa penetrar na razón última, na esencia de les coses.

Hai argumentos a favor de ver un mundu coherente y racional basándose na insignificancia humana respecto a la grandiosidá del universu.

Lo absurdo ye lo que carez de sentíu, lo que nun tien despicación posible, lo inintelixible, lo contrario a la razón. Según el diccionariu de la RAE lo absurdo ye lo estrompético, lo irre-

gular, lo chocante, lo disparatado, lo demencial, lo inconexo, lo arbitrario, lo opuesto a lo que pienses.

La filosofía del absurdo distínguese del nihilismu en qu'esti asegura que nel fondu tou se reduz a la nada ('nihil': nada). Considera que los males del universu nun tienen nada que ver cola realidá del ser humanu, del home, que dios nun existe y nun hai un fin últimu de tipu teolóxicu: nun hai una verdá absoluta o que la realidá ye sólo aparente.

Friedrich Nietzsche, defensor del nihilismu, defendía qu'esta idea de lo absurdo yá esistía na antigua Grecia a traviés de la escuela cínica y tamién s'alcontraba presente nos principios del escepticismu.

Dellos componentes del principiu del absurdo enfótense en cafiar nel conocimientu de la esistencia humana. Sicasí hai otros filosofíes que van escontra la idea de conocer el mundu o la incapacidá completa de comprender como ye. ►

Sísifo, nel Monte Cualmayor

"Había nel Monte Cualmayor una piedrona mui grande, distinta a les de la rodiada. Yera como un ambláu de cuenos y xigues pequeñes qu'apaecién pegaes.

¡Pesaba delles tonelaes!

Entós pasó un diablu perellí, vió la piedra y apañola y pónxola al recostín. Diba caminando con ella pesadamente

pero entónceles apaeció dios que lu siguió y lu escorrió al ver que yera'l diañu. Escorriólu enforma, llevando'l peñu al llombu.

Tantu lu escorrió qu'anque aguantó lo que pudo tuvo qu'aventar la piedra pa poder correr más y esmucise d'ellí".

*Manuel Estrada, 79 años (+)
Vega, vivía na Cai (Seloriu)*

Dalgunos teóricos recomiendan la posibilidá d'enfrentase coles dificultaes planteaes por esta tesis. Hai trés soluciones possibles a ella que son: 1) el suicidiu, 2) la creencia relixosa nun fin superior y 3) la rebelión contra l'absurdo.

De les posibles soluciones ye la de la rebelión la más siguida polos clásicos, la más absurda de toes.

Dellos críticos col absurdismo suelen sostener que la vida tien sentíu y señalen les supuestes incoherencies: Utilicen la ironía como solución a lo que se plantea. Consideren que se debe tomar la vida con menos seriedá, anque esa idea ye censurada polos absurdistas.

Camus y Kierkegaard

La filosofía defendida por Camus o Kierkegaard, inspiráse nel esistencialismu y ésti na responsabilidá individual, la llibertá, les emociones o nel significáu de la vida.

Pa Camus, sicasí, "l'absurdismo ye la búsquedá de significáu a dalgo que nun tien nengún" o, dicho d'otra miente, la vida humana nun esiste pal universu que la rodea, yá que na so insignificancia l'home lleva nel mundiu una pequeña porción de tiempu: apenes 300.000 años, de los 13'850 millones d'años que presenta l'universu.

Camienta Camus que "toles grandes aiciones y tolos grandes pensamientos tienen un razonamientu ínfimu. Les grandes obres nacen a la vuelta d'un requexu o a la puerte d'un restaurante, y lo mesmo l'absurdizéz.

El mundu absurdu algama la so nobleza, más que ningún otru, d'esi nacimientu miserable", esplica.

Repetir ciclos o'l suicidiu

Col Mitu de Sísifo Camus quier mostrar que la vida ta basada en repetir ciclos: comer, dormir, trabayar... Lo mesmo un día y otru, hasta que te das cuenta que siempre ye lo mesmo, que la vida ye reiterada y valera.

Élli ve nel suiciu una salida acertada pero cobarde d'encarar el sentiu de la esistencia. Pero de toes formes nun cree que tenga que ser un calvariu, sinón que puede ser el motivu d'una redención.



Camus parez qu'apuesta pola salida hacia'l suicidiu como forma de reacionar énte lo absurdo, pero sicasí dexa una rendixa a traviés de la interpretación de lo metafísico/relixoso.

Pescancia que les idees metafísiques/relixoses, o la relixón ensin dios, que defendió con procuru hasta que fuera espulsáu, per esti motivu, como militante del Partíu Comunista y quiciabes atopó la

muerte nun atentáu en Villablevín en 1960.

El Premiu Nobel de lliteratura en 1957 defendió la filosofía del absurdo n'otra de les sos creaciones lliteraries cimeres, L'estranxeru, asoleyada en 1942.

El protagonista la historia ye Meursault, un arxelín 'pied noire' al que-y muerre so madre que se ve enguedeyáu nel asesinatu d'un 'indíxena' na playa de Mazalquivir y les consecuencias absurdes qu'esti fechu tien tres l'ingresu na prisión.

Xamás se manifestará contra'l so axusticiamientu nin mostrará sentimentu dalgún d'inxusticia, arrepentimientu o llástima. La pasividá y l'escepticismu frente a tou y a toos percuerre'l comportamientu del protagonista: un sentiu apáticu de la esistencia y amás de la propia muerte. ■

C uando yera un mocosu de cinco años, nel primer cursu del San Francisco, llevé la primera sorpresa de mio vida. Dime cuenta de que tolos ñeños nun yéramos iguales. Non, nun digo que fuéramos al cole Xu con diferente manforlán, con diferente xersé o con diferente corte de pelu. Na cabeza de les personnes pequeñes de cinco años teníemos una etiqueta cuantica que marcaba la nuestra diferencia como ser humanu.

Cuando deprendimos a sumar y a multiplicar, unos guahes cafiaben, un mes y otru tamién, cola tabla del uno, mientres otros trituraben el catálogu completu a la primera de cambiu.

Nun yéramos mui conscientes de lo que significaba aquello, pero de dalguna forma esi nun yera l'almuerzu de cada mañana, yera l'almuerzu de tola nuestra vida, magar que naide nos lo enseñara.


Nun ye cuestión d'igualar a la xente, hai que da-y una equiparación de derechos, claro; pero non igualar con una cuchiella. Si uno ye feu, o nun tien habilidaes deportives, o carez de locuacidá... nun tien que dedicase al cine, nin a xugar al baloncesto, nin a dar mitis políticos.

Hai formes de meyorar les coses, acordies con otros tantes habilidaes qu'un tien, y que naide puede desempeñales meyor que tú.

Pero la vida ye una carrera d'escoyos que ye mester superar. Na sociedá ñala una especie diversa d'individuos qu'en parte pola xenética, en parte por circunstancies supuestamente ambientales, nun se pueden equiparar.

Opinión

VILLAZÓN



Lluís PORTAL

"Con un microscopiu de barríu electrónicu podemos comprobar que dos gotes consecutivos del mesmu grifu son tan diferentes ente sí, que sólo l'orde cronolóxicu permite asegurar que pertenecen al mesmu grifu".

Antonio Escohotado

"Nun existe naide más inferior que los que caien en que toos somos iguales".

Friederich Nietzsche

Meritocracia.

La relaxación de los medios educacionales que rechacen el méritu, o'l relax a la hora d'escoyer a los mejores nes meyores codiciones, sotou n'aquelles plases onde la distinción nun ye posible porque d'ella depende la vida de los individuos, son la muestra de la nuestra segura decadencia.

La cosa parez más propia d'una ideoloxía que tiende a estrangular la capacidá particular que d'una forma "enquivocada d'equiparación social de toos en pro de una supuesta iguadá que nun

llega nin llegará nunca" (Escohotado dixit).

Nun hai dos señores que tengan la mesma güeya dixital, igual que nun hai dos flores con los sos magníficos pétalos iguales, nin dos rates colos mesmos caniles...

A medida que díbamos creciendo diba afitándose la nuestra admiración hacia personnes que destacaben por propia iniciativa (a lo menos na mio débil 'memoria histórica' o 'histérica' asina ye). Ente eses personnes destacaba Pedro Villazón y dalgún más: Dominguez, Poldo...

Ente los misos recuerdos embaraos figura cómo Villazón yera un gran aficionáu al fútbol -del Bilbao d'Iribar, como la mayoría-, xugaba al balompié, lleía mui afín de filosofía y política, imitaba perbién al perimitable Carrillo, compartia mesa en La Espuma de Roberto o Los Tres Leones y en dalgún otru antru asemeyáu, 'tête a tête', col vieyu Calilo.

Les coses pa él nun fueron como debía. Esa raseru qu'iguala y desiguala nada tien que ver con polítiques humanes de supuesta simetría que nos venden, sinón cola llibertá individual que nos dexa la entruga intelectual de por qué pasa, dalgo que yá contestó'l pedagogu Alfred Binet al Gobiernu francés en 1905.

Al final, nun hai nada enriba nin debaxo la tierra con capacidá d'igualar un res. Aquel guahe estigmatizáu por que yera gordu, o porque llevaba gafes, o porque-y faltaba un gayatu de pie, tien la posibilidá de quexase, por supuesto, pero non a los políticos. La iguadá nun existe más que na mente de los que saquen réditu d'él. ■



I
Güei morrió mamá. O quiciás ayeri. Nun lo sé. Recibí un telegrama del asilu: "Falleció so madre. Intierru mañana. Sentíu pésame". Pero nun quier decir nada. Quiciás fue ayer.

L'asilu d'ancianos afáyase en Marengo, a ochenta kilómetros d'Arxel. Tomaré l'autobús a les dos y llegaré de tardi. D'esa manera podré velala, y regresaré mañana de nueche. Pidí dos díes de permisu al mio patrón y nun pudo negámelos ante semeyante escusa. Pero nun parecía satisfechu. Llegué a dici-y: "Nun ye culpa mía". Nun me respondió. Pensé entóncenes que nun debía habe-ylo dicho. Al fin y al cabu, nun tenía por qué escusame. Más bien-y correspondía a él presentame les condolencies. Pero farálo sin dulda pasao mañana, cuando me vea de llutu. A esta hora, ye un poco como si mamá nun tuviera muerta. Dempués del intierru, pel contrario, será un asuntu archiváu y tou habrá alquirío aspectu más oficial.

Tomé l'autobús a les dos. Facía muchu calor. Comí nel restorán de Celeste como ye costume. Toos se condolieron muchu de min, y Celeste dixome: "Madre hai una sola". Cuando partí, acompañaronme hasta la puerte. Sentíame un pocu aturdíu pues fue necesario que subiera hasta'l cuartu de Manuel pa pidi-y prestaos una corbeta negra y un brazalete. El perdió al so tíu fai unos meses.

Corré p'algamar la llinia. Sentíme apigaciar, ensin dulda pola priesa y la carrera, axuntando'l vaivén, el dolor a gasolina y los reflexos del camín y del cielu. Dormí cásique tol traxectu. Y cuando esperté, taba apoyáu escontra un militar que me sonriyó y me entrugó si venía de lloñe. Dixi "sí" pa nun tener que falar más.

L'asilu ta a dos quilómetros del pueblu. Ficí'l camín a pie. Quixi ver a mamá deseguida. Pero'l porteru dixome que yera necesario ver antes al direutor. Como taba ocupáu, esperé un pocu. Mientras tantu, el



L'ESTRANXERU (1942)

porteru tuvo falando, y deseguida vi al direutor. Recibíome nel so despachu. Yera un vieyucu condecoráu cola so Lexón d'Honor. Miróme colos sos güeyos claros. Dempués estrechóme la mano y retúvola tantu tiempu que yo nun sabía cómo retirala. Consultó un legaxu y dixome: "La señora de Meursault entró equí fai tres años".

"Usté yera'l so únicu sostén". Creí que me reprochaba dalguna cosa y empecé a da-y les despliaciones. Pero interrumpióme: "Nun tien usté por qué xustificase, fíu. Lleí'l legaxu de so madre. Usté nun podía cargar coles sos necesidaes. Ella necesitaba una enfermera.

El so salariu ye modestu. Y, a fin de cuentes, yera más feliz equí". Dixi: "Sí, señor direutor". Elli axuntó: "Sabe usté, equí tenía amigos, personnes de la so edá. Podía compartir recuerdos d'otros tiempos. Usté ye xoven y ella debía d'aburrise con usté".

Yera verdá. Cuando mamá taba en casa pasaba'l tiempu en silenciu, siguiéndome cola mirada.

Pente los primeros díes que tuvo nel asilu lloraba darréu. Pero yera pola fuerza de la costume. Al cabu d'unos meses habría llorao si la hubieran retirao del asilu.

Siempre pola fuerza de la costume. Un pocu por eso nel últimu añu casi nun fui a vela. Y tamién porque me quitaba'l domingu, ensin contar l'esfuerzu de dir hasta la llinia, tomar los billetes y facer dos hores de camín.

El direutor falóme tovía. Pero quasi nun lu escuchaba. Llueu dixome: "Supongo qu'uesté quier ver a so madre". Llevantéme, ensin decir nada, y salió delantre min. Na escalera esplicóme: "Llevámosla al nuestru pequeñu depósitu. Pa non impresionar a los otros. Cada vez qu'un pensionista muerre, los otros siéntense nerviosos durante dos o tres díes. Y dificulta el serviciu".

Atravesamos un patiu n'onde había muchos vieyos, charlando en pequeños grupos. Callaben cuando pasábemos. Y entamaben les conversaciones xusto detrás de nós.

Diríase un sordu parlotéu de cotorres. Na puerte d'un pequeñu edificiu'l direutor abandonóme: "Déxolu a usté, señor Meursault. Afáyome a so disposición nel mio despachu. En principiu, l'intierru ta fixáu pa les diez de la mañana. Pensamos qu'asina podría usté velar a la difunta. Una última palabra: según parez, so madre expresó a menudu a los sos compañeros el pruyimientu de ser enterrada relíxiosamente. Tomé al mio cargu facer lo necesario.

"Pero quería informalu a usté". Dí-y les gracies. Mamá, ensin ser atea, enxamás había pensao na relixón mientras vivió.

Entré. Yera una sala mui clara, blanquiada a la cal, con techume de vidriu. Tabá amueblada con siyes y caballetes en forma de X. Nel centru la sala, dos caballetes sostién un férretru zarráu cola tapa. Sólo se veín los tornillos rellumantes, fundíos malpenes, destacándose sobre les tapes pintaes de nogalina (...). ■